

Na osnovu člana 33 Statuta, na prijedlog Upravnog odbora kluba, Atletski klub "Novi Grad Sarajevo" na skupštini održanoj dana 25.03.2022. godine donosi:

DISCIPLINSKI PRAVILNIK - UDRUŽENJE ATLETSKI KLUB "NOVI GRAD SARAJEVO"

I OSNOVNE ODREDBE

Član 1.

Disciplinski pravilnik Udruženja Atletski klub "Novi Grad Sarajevo" (u dalnjem tekstu: Pravilnik) utvrđuje disciplinske prekršaje te propisuje mjere, kazne i postupak za kažnjavanje disciplinskih prekršitelja atletskog sporta koji se tiču članova Atletski klub "Novi Grad Sarajevo" (u dalnjem tekstu: Klub)

Član 2.

Disciplinski prekršaj je narušavanje sportske discipline utvrđene ovim Pravilnikom, te svako kršenje odredbi Statuta, pravilnika i kodeksa ponašanja i drugih akata kluba za koji je predviđena disciplinska mjera.

Članak 3.

Disciplinski postupak i izricanje kazne obavlja Disciplinska komisija i druga tijela određena ovim Pravilnikom.

Član 4.

Disciplinski prekršaj može biti obavljen činjenjem ili propuštanjem obavezne radnje. Prekršaj je učinjen kad je izvršitelj učinio ili bio obavezan činiti, a posljedica je nastupila.

II. ODGOVORNOST I KAŽNJAVANJE ZA DISCIPLINSKI PREKRŠAJ

Član 5.

Za odgovornost za disciplinski prekršaj dovoljan je i nehat, ako propisom nije određen umišljaj ili gruba nepažnja.

Član 6.

Za disciplinski prekršaj može biti odgovoran svaki član Kluba:

- a) aktivni članovi,
- b) prijatelji kluba - svi ostali članovi

Član 7.

Radnja koja je obavljena u nužnoj obrani ili krajnjoj nuždi ne smatra se disciplinskim prekršajem. Za disciplinski prekršaj također nije odgovorna osoba koja je radnju počinila pod uticajem prisile, prijetnje te stvarne ili pravne zablude.

Član 8.

Nepoznavanje propisa kojim je predviđen disciplinski prekršaj ne oslobađa odgovornosti disciplinskog prekršioca.

Član 9.

Osoba koja potiče drugog na počinjenje prekršaja te osoba koja pomaže u počinjenju prekršaja kaznit će se kao da je sama počinila prekršaj ukoliko se prekršajna radnja ostvari.

III. DISCIPLINSKE MJERE

Član 10.

Za disciplinski prekršaj mogu se izreći sljedeće disciplinske mjere (kazne):

- a) Opomena bez izricanja kazne,
- b) Opomena uz mogućnost izricanja: novčane kazne, kazne zabrane učetovanja na takmičenjima ili obavljanja dužnosti na određenom broju treninga/takmičenja ili na određeno vrijeme,
- c) isključenje iz Kluba, mora potvrditi Skupština kluba;

Disciplinske mjere zabrane igranja ili obavljanja dužnosti mogu biti zamijenjene djelomično ili u cjelini novčanom kaznom.

Disciplinske mjere pod tačkom b) ovog člana mogu se izreći i kao kazne čije se izvršenje odgađa na određeni rok (uvjetna kazna), a vrijeme provjeravanja može biti u trajanju od tri (3) do dvanaest (12) mjeseci.

Ukoliko Disciplinska komisija ocijeni da izvršioc prekršaja nije počinio disciplinski prekršaj koji mu je stavljen na teret, donosi odluku kojom okrivljenika oslobađa disciplinske odgovornosti.

Član 11.

Prilikom odmjeravanja kazne počinitelju disciplinskog prekršaja moraju se uzeti u obzir sve olakšavajuće okolnosti koje postoje u konkretnom slučaju, njegove posljedice, stepen odgovornosti disciplinskog prekršioca, s kojom namjerom je prekršaj učinjen, prijašnje ponašanje, moralne osobine i ponašanje disciplinskog prekršioca poslije učinjenog disciplinskog prekršaja

Član 12.

Pri odmjeravanju kazne u slučaju ponovnog disciplinskog prekršaja od strane istog počinitelja, ako drugačije nije određeno, može se izreći strožija kazna od propisane.

Strožija kazna ne može se izreći kad je od dana izdržane kazne do novog disciplinskog prekršaja proteklo više od dvije godine.

Član 13.

Ako disciplinski prekršitelj jednom radnjom počini više disciplinskih prekršaja, kazna mu se izriče po propisu koji predviđa strožiju kaznu. Ako je prekršitelj počinio više disciplinskih prekršaja, a postupak se provodi pred Disciplinskom komisijom, utvrdit će se prije svega kazna za svaki disciplinski prekršaj, pa će se izreći jedinstvena kazna koja ne može prijeći dvostruku visinu najviše utvrđene kazne.

Član 14.

Disciplinski postupak ne može se pokrenuti ako protekne dvanaest (12) mjeseci računajući od dana kad je prekršaj učinjen.

Rješenjem izrečena disciplinska mjera ne može se izvršiti ako protekne šest (6) mjeseci od dana pravomoćnosti toga rješenja.

Član 15.

Zastara se prekida svakom radnjom nadležnog tijela poduzetom radi disciplinskog gonjenja za disciplinski prekršaj, odnosno radi izvršenja disciplinske kazne izrečene u obliku pisane odluke. Disciplinski postupak u svakom se slučaju ne može pokrenuti, niti se može izvršiti izrečena disciplinska kazna, ako istekne dvostruko vrijeme određeno članom 14. ovog Pravilnika (poslije dvanaest (12) mjeseci za izvršenje, a dvadeset četiri (24) mjeseca za pokretanje).

IV. DISCIPLINSKI PREKRŠAJI

Nesportsko ponašanje

Članak 16.

Član Kluba koji se u funkciji aktivnog člana učesnika ili trenera nesportski ponaša prema drugim učesnicima, atletskim djelatnicima ili gledateljima ili koji je više od dva puta opomenut bez izricanja kazne zbog ponašanja koje nije u skladu sa „Kodeksom ponašanja Atletskog kluba “Novi Grad Sarajevo” kaznit će se na jedan od sljedeća dva načina:

- a) Opomenom uz izricanje zabrane treniranja, igranja i obavljanja dužnosti do šest (6) mjeseci, ili
- b) Isključenjem iz Kluba.

Pod opomenom bez izricanja kazne smatra se pismena ili e-mail opomena od strane Upravnog odbora kluba. Ukoliko se radi o maloljetnom članu Kluba, opomena se uručuje jednom od roditelja/staratelja.

Otvoreni napad

Član 17.

1. Atletičar ili atletski djelatnik koji otvoreno napadne drugog učesnika, atletskog djelatnika ili gledatelja kaznit će se opomenom uz izricanje kazne zabrane igranja ili obavljanja dužnosti do šest (6) mjeseci ili opomenom uz izricanje kazne zabrane učestvovanja na od jednom (1) do tri (3) takmičenja, uz mogućnost dodatne novčane kazne, na osnovu odluke disciplinske komisije.
2. Ako se prilikom prekršaja iz prethodnog stava ovog člana nanese teška tjelesna povreda, prekršitelj će se kazniti do dvostrukе kazne iz tačke 1. ovog člana Pravilnika.
3. Ko s namjerom započne ostvarenje prekršajnog djela, ali ga ne dovrši kaznit će se kao da je djelo dovršio te se može kazniti blažom kaznom iz člana 17. ovog Pravilnika.

Uvreda i kleveta

Članak 18.

Član Kluba koji uvrijedi, iznosi ili pronosi neistinu o Klubu, aktivnim članovima - takmičarima i atletskim djelatnicima kaznit će se opomenom uz izricanje kazne zabrane učestvovanja na takmičenjima, odnosno obavljanja dužnosti do šest (6) mjeseci ili zabranom igranja od jedne (1) do tri (3) takmičenja.

Nagovaranje

Član 19.

1. Član Kluba koji nagovara aktivnog člana Kluba da se ne iskazuje prema svojim mogućnostima ili da radi protiv interesa Kluba kaznit će se opomenom uz izricanje kazne zabrane igranja, odnosno obavljanja dužnosti do šest mjeseci ili zabranom igranja od jednog (1) do šest (6) takmičenja.
2. Jednakom kaznom kaznit će se takmičar koji postupi po nagovoru, opisanom u prethodnom stavu ovog člana Pravilnika.

Član 20.

1. Član Kluba koji obećanjem dara ili neke koristi potiče atletskog djelatnika ili drugog Člana Kluba da učini nešto protivno propisima Kluba i Atletskog saveza BiH i Atletskog saveza Federacije, odnosno da ne učini ono što je dužan učiniti prema tim istim propisima, kaznit će se opomenom uz izricanje kazne zabrane učestvovanja na takmičenju, odnosno obavljanja dužnosti do šest (6) mjeseci.
2. Jednakom kaznom kaznit će se član koji preuzme dar, obećanje dara ili neke koristi za izvršene radnje opisane u prethodnom stavu ovog člana Pravilnika.

Član 21.

Ukoliko je član Kluba službenim zastupanjem Kluba učinio disciplinske prekršaje iz ovog Pravilnika te je Klub kažnjen od strane Atletskog saveza BiH i Atletskog saveza Federacije prema Disciplinskom pravilniku nekog od naprijed navedenih saveza, odgovorni član dužan je snositi novčanu kaznu u istom iznosu kazne izrečene od strane Atletskog saveza Klubu.

Otežavanje dokazivanja u postupku

Član 21.

Član Kluba koji lažno svjedoči ili na drugi način otežava Disciplinskoj komisiji utvrđivanje materijalne istine i provedbu bilo kakvog postupka kaznit će se opomenom uz izricanje kazne zabrane takmičenja ili obavljanja dužnosti do šest (6) mjeseci.

Neodazivanje pozivu

Član 22.

1. Član Kluba koji se ne odazove pozivu Disciplinske komisije, a poziv može biti upućen izravno u pisanom obliku putem pošte, e-maila ili putem pisanih ili elektronskih medija i to ne opravlja u roku od četrdeset osam (48) sati od dana poziva, kaznit će se Opomenom bez izricanja kazne, a u ponovljenom slučaju opomenom uz izricanje kazne zabrane takmičenja, odnosno obavljanja dužnosti do šest (6) mjeseci te mu se može izreći i suspenzija.
2. Člana Kluba ne opravdava odbrana u kojoj navodi da on taj poziv nije putem medija čuo ili pročitao, niti ga ispričava činjenica da se u trenutku objave u medijima isti nalazi u inozemstvu.

Neprovođenje odluka

Član 23.

1. Član Kluba koji ne postupi po nalogu, odluci ili rješenju Disciplinske komisije kaznit će se opomenom uz izricanje kazne zabrane takmičenja, odnosno obavljanja dužnosti do šest (6) mjeseci, uz mogućnost istovremenog izricanja novčane kazne.
2. Neovisno o izrečenoj kazni iz prethodne točke ovog člana Pravilnika, član je dužan u ostavljenom mu roku iz odluke ili rješenja izvršiti nalog Disciplinske komisije zbog kojeg je izrečena kazna, a ukoliko ne postupi po nalogu može biti isključen iz Kluba te mu se može izreći suspenzija do konačne odluke Skupštine kluba o isključenju iz Kluba.
3. Ukoliko član ne plati novčanu kaznu predviđenu tačkom 1. ovog člana, u roku koji je naveden u odluci ili ako rok u odluci nije naveden, a ne plati u roku od osam (8) dana računajući od dana pravomoćnosti donesene odluke, Disciplinska komisija može izreći suspenziju.

Obmanjivanje i dovođenje u zabludu

Član 24.

Član koji namjerno obmanjuje ili dovodi u zabludu Klub u bilo kojem pogledu, kaznit će se opomenom uz izricanje kazne zabrane igranja, odnosno obavljanja dužnosti do šest (6) mjeseci.

Nesavjesno djelovanje i prikrivanje

Član 25.

1. Član koji kršenjem propisa ili na drugi način očigledno nesavjesno postupa u obavljanju svojih dužnosti kaznit će se opomenom uz izricanje kazne zabrane igranja, odnosno obavljanja dužnosti do šest mjeseci.
2. Član koji sazna za učinjeni disciplinski prekršaj, a ne prijavi ga ili ne pokrene prekršajni postupak kaznit će se opomenom uz izricanje kazne zabrane igranja, odnosno obavljanja dužnosti do šest (6) mjeseci ili zabranom učestvovanja od jednog (1) do šest (6) takmičenja.

Podnošenje lažne prijave

Član 26.

Član koji podnose neistinitu prijavu protiv drugog člana Kluba, a znao je ili mogao znati da prekršaj nije počinjen, kaznit će se opomenom uz izricanje kazne zabrane igranja, odnosno obavljanja

dužnosti do šest (6) mjeseci ili zabranom učestvovanja na jednom (1) do šest (6) utakmičenja uz mogućnosti izricanja novčane kazne.

Prekršaji u vezi registracije

Član 27.

1. Član koji Klubu pri registraciji dostavi lažne ili netačne podatke kaznit će se zabranom učestvovanja na takmičenjima do šest mjeseci, te mu se može izreći novčana kazna u iznosu novčane kazne koju su nadležni atletski savezi prema svojim pravilnicima odredili kao kaznu Klubu za nastupanje sa dotičnim nepravovaljano registriranim članom.
2. Jednakom kaznom kaznit će se igrač koji unosi ili prepravlja podatke u natjecateljskoj iskaznici.

Neizvršavanje disciplinskog rješenja

Članak 28.

1. Član Kluba koji ne postupi u skladu s izvršnim rješenjem Disciplinske komisije, a nastupa ili obavlja dužnost unatoč pravomoćno izrečenoj disciplinskoj kazni zabrane nastupanja odnosno zabrane obnašanja dužnosti, može se kazniti doživotnim isključenjem iz Kluba.
2. Član Kluba koji ne postupi u skladu s izvršnim rješenjem Disciplinske komisije i ne plati pravomoćno izrečenu novčanu kaznu, u roku koji je naveden u samoj disciplinskoj odluci ili ako rok u odluci nije naveden, a ne plati u dalnjem roku od osam (8) dana računajući od dana pravomoćnosti donesene novčane kazne, Disciplinska komisija zbog neplaćanja može članu izreći novu novčanu kaznu, koja je najmanje dvostruko veća od iznos prethodno izrečene novčane kazne, te se može izreći suspenzija, koja može trajati sve dok se novčana kazna ne plati.

V. DISCIPLINSKI POSTUPAK

Osnovna načela u postupku

Član 29.

Disciplinsko tijelo koje vodi postupak djeluje i odlučuje na osnovi ovoga Pravilnika i drugih propisa Kluba.

Disciplinsko tijelo koje vodi postupak dužno je utvrditi činjenice radi donošenja zakonitog i ispravnog rješenja, obavezno je jednakom pažnjom ispitati okolnosti koje terete izvršioca prekršaja i okolnosti koje mu služe u odbrani.

Član 30.

Prije donošenja rješenja izvršilac disciplinskog prekršaja mora se saslušati u vezi s predmetom zbog kojega se protiv njega vodi postupak. Pod saslušanjem se podrazumijeva i davanje pisane izjave.

Ako uredno pozvan disciplinski prekršioc odbije da u naznačenom roku dođe na saslušanje ili ne dostavi pisanu izjavu, postupak će se nastaviti bez saslušanja, odnosno bez prisustva izvršioca prekršaja. Pod «uredno pozvan» smatra se dostava poziva za pisanu izjavu na adresu prekršitelja ili njegovu e-mail adresu.

Član 31.

U disciplinskom postupku Disciplinsko tijelo vodi postupak i donosi rješenje u okviru svoje nadležnosti.

Koje će činjenice uzeti kao dokazane, odlučuje disciplinsko tijelo prema svome uvjerenju na temelju savjesne i brižljive ocjene svakog dokaza posebno i svih dokaza zajedno, te na temelju rezultata cjelokupnog postupka.

Član 32.

Disciplinski postupak vodi se sa što manje troškova i gubitka vremena za sve sudionike u postupku, ali tako da se pribave svi dokazi potrebni za ispravno i potpuno utvrđenje činjeničnog stanja i donošenje zakonitog i ispravnog rješenja.

Član 33.

Disciplinskom tijelu u radu pomažu stručni suradnici kojima se može u postupku povjeriti obnašanje pojedinih radnji neophodnih za donošenje ispravne odluke.

Protiv rješenja Disciplinskog tijela može se izjaviti žalba osim u slučaju kada je odluka konačna

Disciplinska tijela za vođenje postupka

Član 34.

1. Disciplinski postupak vodi Disciplinska komisija.

Disciplinsku komisiju imenuje Upravni odbor kluba i bira se iz aktivnih članova Kluba.

Članovi Disciplinske komisije ne mogu biti članovi Upravnog odbora kluba

Disciplinska komisija je samostalno u svom radu i donošenju odluka te nitko na nju ne može vršiti bilo kakav pritisak.

2. Upravni odbor kluba odlučuje u prvom stepenu po žalbama izjavljenim protiv odluke Disciplinske komisije.

3. Skupština kluba odlučuje u drugom stepenu po žalbama izjavljenim protiv odluke Upravnog odbora kluba. Odluka Skupštine kluba je konačna.

Član 35.

Član Disciplinskog tijela izuzet će se u disciplinskom postupku, ako postoje okolnosti kojem mogu opravdati sumnju o subjektivnoj pristranosti.

VI. POKRETANJE I TOK DISCIPLINSKOG POSTUPKA

Član 36.

Prijavu o počinjenju disciplinskog prekršaja podnosi pisanim putem Upravni odbor na vlastitu inicijativu ili na prijedlog pet ili više aktivnih članova Kluba.

Nakon primjeka prijave o počinjenju disciplinskog prekršaja, disciplinski postupak se pokreće, u skladu sa ovim Pravilnikom, posebnim zahtjevom za pokretanje disciplinskog postupka, a koji zahtjev se temelji na podnesenoj prijavi.

Član 37.

Nakon zaprimanja Zahtjeva za pokretanje disciplinskog postupka, Disciplinska komisija propisuje sve radnje koje će provesti u postupku i kojim dokaznim načinima, te ocjenjuje i druge prijedloge i izjave u postupku radi utvrđivanja istine (kojim redom i u kojim rokovima, odlučuje o provođenju rasprave ili ne, saslušavanju, suočavanju ili će se ograničiti samo na traženje dokaza).

Pokretanje i tok postupka radi štedljivog raspolaaganja vremenom određuje Disciplinska komisija u skladu s okolnostima pojedinog slučaja i odnosom podnijetih dokaza, te ako utvrdi činjenično stanje, može i bez posebnog pokretanja postupka odlučiti o kazni. U obrazloženju odluke to se mora navesti.

Član 38.

U disciplinskom postupku saslušanje izvršioca prekršaja, svjedoka i prikupljanje ostalih dokaza provodi Disciplinska komisija.

Član 39.

Počinitelj disciplinskog prekršaja ima pravo i obavezu o svom trošku biti pozvan i sudjelovati u postupku radi zaštite svojih prava i interesa kada to izrijekom zahtjeva, ali u roku koji je predviđen za okončanje postupka ovim Pravilnikom.

Član 40.

U pojedinim radnjama koje se poduzimaju tokom saslušavanja obvezno se sastavlja zapisnik. U zapisnik se stavlja bitan sadržaj poduzete prekršajne radnje. Zapisnik potpisuju: službena osoba koja vodi postupak, saslušana osoba (prekršitelj ili svjedok) i zapisničar.

VII. SUSPENZIJA

Član 41.

Član može biti suspendiran ako počini disciplinski prekršaj koji svojim posljedicama šteti ugledu i interesu Kluba i čija bi produžena aktivnost nanijela štetu Klubu.

Član 42.

Suspenzija može biti:

- a) automatska,
- b) odlukom Disciplinske komisije,
- c) uvjetna i bezuvjetna.

Članak 43.

Automatska suspenzija se primjenjuje:

- a) ako je član Kluba udaljen s javnog takmičenja,
- b) ako član Kluba neopravdano odbije doći na saslušanje ili odbije uputiti pisanu izjavu službenom atletskom djelatniku ili atletskom tijelu, odnosno ako ne uputi utvrđene izvještaje u provedbi svojih dužnosti,
- d) ako član Kluba ne vrati atletsku opremu opremu,
- e) odnosno u drugim slučajevima predviđenim propisima.

O automatskoj suspenziji člana Kluba Klub je dužan obavijestiti nadležna takmičarska i ostala tijela.

Članak 44.

Suspenzija na osnovi odluke Disciplinske komisije može se izreći u svim slučajevima kad je predviđena teža kazna za učinjeni disciplinski prekršaj ili pak kada se ometa, otežava ili odgovlači provedba neke obveze tijekom postupka. Suspenzija može trajati do konačnosti odluke o disciplinskoj kazni odnosno do izvršenja naloga iz odluke odbojkaškog tijela.

Disciplinska komisija može odlukom na zahtjev člana odlučiti i o ukidanju suspenzije, ako ustanovi da se postupak može završiti donošenjem odluke i bez suspenzije.

Član 45.

Protiv odluka o suspenziji može se izjaviti žalba, ali ista ne odgađa izvršenje donesene odluke.

Član 46.

Sve vrijeme provedeno pod suspenzijom uračunava se u vrijeme kazne.

VIII. DONOŠENJE ODLUKA

Član 47.

Na osnovi utvrđenih činjenica u postupku Disciplinska komisija donosi odluku u pisanom obliku. Odluka ima: naziv, imena i potpise članova Disciplinske komisije koje donosi odluku, predmet postupka, preambulu, izreku, obrazloženje, uputu o pravnom lijeku.

Član 48.

Odluka se mora donijeti najkasnije u roku od šezdeset (60) dana računajući od dana kada je disciplinska prijava – Zahtjev za pokretanje disciplinskog postupka zaprimljena.

U složenijim slučajevima rok za donošenje odluke može se produžiti za dodatnih trideset (30) dana.

Ako se u navedenim rokovima ne doneše odluka, zainteresirana strana može zahtijevati od Upravnog odbora kluba donošenje odluke kojom ono određuje rok za Disciplinsku komisiju u kojem treba donijeti odluku.

Član 49.

Odluka se upućuje, najkasnije u roku od tri (3) dana računajući od dana donošenja odluke, ili počinitelju prekršaja na njegovu adresu i to preporučenom poštanskom pošiljkom s povratnicom ili elektroničkim putem na e-adresu.

Obavjest elektronskim putem smatra se obavljenim u trenutku kada je zabilježeno na poslužitelju za primanje takvih poruka.

Uzima se da je pismeno uručeno primatelju u onom trenutku kada je primatelj ili zaprimio preporučenu poštansku pošiljku ili kada je elektronska pošta zabilježena na poslužitelju za primanje elektroničkih poruka pa rokovi predviđeni ovim Pravilnikom teku od dana prvog uručenja.

Ukoliko počinitelj prekršaja odbije primitak pismena ili se isto vrati pošiljatelju s naznakom: „obaviješten - nije podigao pošiljku“, uzima se da je pismeno uručeno s danom predaje pismena pošti.

Ukoliko se pošiljka vrati s naznakom: „primatelj odselio“ odluka se treba objaviti na oglasnoj ploči i web stranici Kluba pa se protekom roka od osam (8) dana smatra da je odluka primatelju uručena uredno i na vrijeme 9-og dana računajući od dana objave odluke na oglasnoj ploči.

Član 50.

Protiv odluke Disciplinske komisije može se u roku od petnaest (15) dana od zaprimanja odluke uložiti žalba Upravnom odboru kluba.

Žalba upućena Upravnom odboru kluba u pisanom obliku dostavlja se preporučenim poštanskom pošiljkom.

Član 51.

Žalba odgađa izvršenje odluke, osim u slučajevima izricanja suspenzije ili u drugim slučajevima predviđenim ovim Pravilnikom.

Ako je žalbu podnio samo okrivljeni, odluka Disciplinske komisije ne može se izmijeniti na njegovu štetu.

Član 52.

Žalbu mogu izjaviti:

- a) izvršioc disciplinskog prekršaja,
- b) podnositelj zahtjeva za pokretanje prekršajnog postupka.

Član 53.

Upravni odbor kluba po primitku žalbe obavještava o istoj Disciplinsku komisiju koja je obavezna dostaviti svoje mišljenje, te cijelokupnu dokumentaciju koja se odnosi na taj prekršajni predmet.

Ukoliko Disciplinska komisija odluci da neće iznositi svoj pisani stav o žalbi, tada je u obavezi nazočiti pred Upravnim odborom kluba i usmeno iznijeti svoj stav o žalbenim navodima.

Član 54.

Upravni odbor kluba može žalbu odbiti i potvrditi odluku, djelimično ili u cijelini prihvati žalbu, pa preinaćiti odluku Disciplinske komisije ili je ukinuti i vratiti na ponovljeni postupak pred Disciplinskom komisijom.

Član 55.

Odluka po žalbi obvezno se donosi i dostavlja najdulje u roku od trideset (30) dana od dana primitka žalbe.

Upravni odbor kluba upućuje svoju odluku s dokumentacijom Disciplinskoj komisiji, a ono odluku upućuje zainteresiranim osobama u postupku žalbe.

Član 56.

Protiv odluke Upravnog odbora kluba može se u roku od petnaest (15) dana od zaprimanja odluke uložiti žalba Skupštini kluba.

Žalba upućena Skupštini kluba u pisanom obliku dostavlja se preporučenim poštanskom pošiljkom.

Član 57.

Odluku po žalbi Skupština kluba obvezatno donosi i dostavlja najduže u roku od devedeset (90) dana od dana primitka žalbe.

Odluka Skupštine kluba je konačna.

IX. IZVANREDNI PRAVNI LIJEKOVI

Obnova postupka

Član 58.

Disciplinski postupak zaključen pravomoćnom odlukom protiv koje nema žalbe obnovit će se:

- a) ako je odluka donijeta na osnovi lažnog iskaza ili nevaljanog dokaza,
- b) ako je odluka bila posljedica disciplinskog prekršaja,
- c) ako je u doноšenju odluke sudjelovala nenadležna osoba ili osoba koja je morala biti izuzeta,
- d) ako se saznaju nove činjenice ili novi dokazi koji bi mogli utjecati na drugačiju odluku da su bili poznati i upotrijebljeni u ranijem postupku, pod uvjetom da u ranijem postupku ti dokazi nisu bili žalitelju poznati.

Član 59.

Obnova postupka ne može se tražiti niti pokrenuti poslije isteka roka od trideset (30) dana računajući od dana saznanja za nove činjenice odnosno dokaze (subjektivni rok) odnosno protekom roka od šest (6) mjeseci računajući od dana pravomoćnosti odluke (objektivni rok).

O prijedlogu za obnovu postupka odlučuje disciplinsko tijelo koje je donijelo odluku kojom je postupak završen.

Član 60.

Prijedlog za obnovu postupka uručuje se osobno ili se šalje disciplinskom tijelu koje je donijelo odluku kojom je postupak okončan.

Disciplinsko tijelo koje odlučuje o prijedlogu za obnovu postupka donosi odluku u roku od trideset (30) dana računajući od dana zaprimanja prijedloga od strane atletske organizacije ili disciplinskog tijela.

Član 61.

U procjeni prijedloga za obnovu postupka, disciplinsko tijelo može prijedlog odbaciti ili odbiti, a konačnu odluku o disciplinskom prekršaju osnažiti ili zamijeniti novom odlukom. Odluka o obnovi postupka ne odgađa provedbu odluke donijete u disciplinskom postupku. Protiv odluke donesene na prijedlog za obnovom postupka, kao i odluke donesene u obnovljenom postupku može se uputiti žalba.

Izvanredno ublažavanje kazne

Član 62.

Iznimno, ako postoje nesumnjivi dokazi da je odlukom disciplinskog tijela kažnjavanjem postignut cilj, Skupština kluba može donijeti odluku o izvanrednom ublažavanju ili oslobođanju od daljnog izdržavanja kazne.

Prijedlog za izvanredno ublažavanje kazne podnosi osoba koja je kažnjena i to kada protekne polovica vremena od početka izdržavanja kazne, a kod doživotnog isključenja igrača nakon proteka pet (5) godina računajući od dana početka izdržavanja kazne.

Član 63.

Sve pravomoćno izrečene kazne evidentiraju se pri disciplinskom povjerenstvu te se trajno pohranjuju u arhivi Kluba.

Ako počinitelj prekršaja u roku dvije godine nakon izdržane kazne ne počini novi prekršaj, smarat će se kao da nije kažnjavan i brisat će se iz evidencije, iz stava 1. ovog člana.

X. PRIJELAZNE I ZAVRŠNE ODREDBE

Član 64.

Disciplinski postupak koji je u toku na dan stupanja na snagu ovog Pravilnika, provest će se i donijet će se odluka po propisima koji su vrijedili do stupanja na snagu ovog Pravilnika.

Član 65.

U pogledu drugih elemenata prekršajnog postupka primjenjivat će se odredbe Zakona o krivičnom postupku, ako to ovim Pravilnikom nije već uređeno.

Član 66.

Ovaj Pravilnik tumači Upravni odbor kluba.

Član 67.

Ovaj Pravilnik stupa na snagu danom donošenja na sjednici skupštine kluba 15.03.2022. godine.

U Sarajevu, 25.03 2022. godine.

Atletski klub Novi Grad Sarajevo

Predsjednik